



UPA 2015/36+37

Tillie Martinussen

23. april 2015

Piitsuussutsip killinganik kingusinnerpaamik UPA 2016-imut atatillugu aalajangersaaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aaja Chemnitz Larsen, Inuit Ataqatigiit)
(Siullermeenera)

Ilaqutariit meerartallit akornanni piitsuussuseq immikkut ukkataralugu aningaasatigut naligiinnginnerup piitsuussutsillu akiorneqarnissaanut iliuusissatut pilersaarusoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut kingusinnerpaamik UKA 2016-imut atatillugu inaarsarneqareersimassaaq.

(Inatsisartunut ilaasortaq Aaja Chemnitz Larsen, Inuit Ataqatigiit)
(Siullermeenera)

Nunami maani tungiuineq pilersinnikuuarput, qularnaarlugu kaattoqassanngitsoq, piitsuusoqassanngitsoq aamma atungarliortoqassanngitsoq nunarsumiarmi sumiiffinni allanisulli soorlu Afrikami Asiamilu. Tamanna perruualaarutigissavarput aamma pingaaruteqarpoq eqqaamassallugu, matumap oqallisiginerani.

Taamatulli oqareerluta, qularutigissanngilarput akornatsinniittoqarmat innuttaasunik ilaqutariinnillu sipaarluinnaqqissaartariaqartartunik aamma pisissutissaqanngitsut namminneq toqqissisimanartumik isumassornissaminnut qitornamillu. Tamanna ajornartorsiutaavoq sukumiilluinnartumik isigisariaqagarput.

Kisianni partiit ataasiakkaarluta tamatta immikkut isumaqarfigunarpaput piitsuussuseq pitsaasumik qanoq akiorsinnaaneripput. Partiit saamiatungaaniittut arlaatigut



eqqarsariaaseqarput, sapinngisamik assigiinnerpaanik atungaqartitsinissaq aaqqiissutissani tassatuaasoq. Demokraatini tamanna isumaqatiginngilarput. Isumaqarpugut piitsuussuseq ajungaaffigineqarsinnaanngitsoq allanut akissarsiarinnerusunut sinnganeq atorlugu. Uangut paasinnittaaserput naapertorlugu iluaqutaaginnarpoq ilaqaratta akissarsiarissaartunik, taakkumi ineriartortitseqataapput suliffissanillu pilersitseqataasarlutik.

Paarlattuanik pissakinnerpaat qanoq iliorluta atugarissaarnerulersissinnaanissaat eqqartortariaqarparput. Ilaatigut sulinissaq pilerinarninngortinniartariaqarpoq. Ullumikkut ajoraluartumik innuttaasut ilaannut sulineq suunngitsuaqqamik iluanaaruteqarfiusarpoq ilaannilu iluanaarutaanngilluinnartarluni. Tamanna ajuusaarnarpoq iliuuseqarfigisariaqarlunilu. Aaqqiissutissanut ilaavoq sulinermut ilanngaammik eqqussinissaq. Tamatuma saniatigut sulliviit atugaat pitsanngorsartariaqarpagut, taakku piumassuseqarneruleqqullugit suliffinnik pilersitsinissamut, amerlanerit suliffissaqaleqqullugit aamma innuttaasut taamaasillutik piitsuunermiik aninguiniassammata.

Paarlattuanik iluaqutaanngilaq isertitaqqortuut akileraarnerulersinnissaat imaluunniit allatigut isertitaqqortussuseq naapertorlugu akileraarnerulersitsisalnissaq. Ineriartornermut akornqutaassaaq aamma inuit sulinerorusussuseqarnerat innarlerneqassaaq.

Taamatulli oqareerluta Demokraatini suleqataaffigerusupparput piitsuunerup akiorneqarnissaa qularnaarlugulu pissakinnerpaat atugarissaarnerulernissaat, ullumikkut akissaalatsitut akissaqarneruleqqullugit.

Taamaattumik allannguutissatut siunnersuummik imaattumik siunnersuuteqarpugut:

"Naalakkersuisut peqqunqarput kingusinnerpaamik UKA 2017-mi saqqummiusseqqullugit nassuiaammik, inuiaqatigiittut qanoq iliorluta sulissutigisinnaaneripput innuttaasut akissaqalernissaat, qularnaarumallugu innuttaasut ataasiakkaat taakkulu ilaqutaasa isumassuinermut pingaarnermut akissaqarnissaat pitsaasumillu inuuneqarnissaat anguneqarnissaa. Nassuiaammi aamma isummerfigineqassaaq piitsuussutsip killissaa pillugu nassuiaasinnaanissaq ajornanngippallu angissusiliinissaq."



Allannguutissatut siunnersuut Ilaqutariinnermut Peqqissutsimullu ataatsimiititaliamut innersuupparput. Inuit Ataqatigiit siunnersuutigeqqaagaat kiisalu Naalakkersuisunit allannguutissatut siunnersuutaata itigartinneqassasut inassutigaarput.